

(10) **Te Hui a muri nei.** Kia whakaritea hei te 12 o nga ra o Hurae ka hui a ano tenei Komiti, ko te karakia nui hei taua ahiahi, a ko nga mahi a te hui hei te 13 o nga ra o Hurae.

(11) **Tauranga.** Na W. Kingi te motini, na Hemi Te Uara i tautoko; Kia tonoa e tenei Komiti ki te Komihari (commissary) o te Pihopatanga kia whakawateatia a Rev. Peneti kia haere ia ki nga takiwa o te Atirikonatanga o Tauranga ki te whakaoho i nga mahi a te Hahi.

(12) **Raruraru o nga Mema.** Na W. Kingi te motini: Kia waiho ma ia pariha e whakarite nga raruraru o nga mema e haere mai nei ki nga hui a tenei Komiti

(13) **Mihi ki te Tiamana.** Na Paora Temuera te motini. Na Kereopa i tautoko.

Kia puta he mihi ma tenei Komiti ki te Tiamana ki a Rev. P. Peneti mo tona kaha me tona marama ki te whakahaere i nga take hei whiriwhiri ma tenei hui tuatahi o te Komiti Tumuaki.

HE HONORE.

TE RAUMOA BALNEAVIS, M.Y.O.

Tenei kei te hari kei te mihi ta koutou pepa mo tenei honore nui, kua tau nei ki runga ki tetahi o nga tamariki mahi nui, o te motu. E hara a Te Raumoa i te tangata tu nui ki nga marae, kaore tona reo e rangona nuitia ana e nga iwi o te motu. Otira ko nga tangata e mohio ana ki te putake mai o nga whakahaere e mahia mai nei i Poneke hei painga mo te iwi Maori, kei te kite atu i nga kaha o Te Raumoa ki te whakatikatika haere i nga take e pa ana ki te iwi Maori. Ko ia o tatou katoa kei te noho tuturu mai i te taha o o tatou mema o te Paremata. Nga take Maori ki te Pirimia tukuna atu ai ki a ia i te tuatahi. Mana e tatari nga take tika, me nga take he, nga tangata whakaro tika, me nga whakaro tinihanga.

Kua mahia enei tau e noho ana ia hei Hekeretari mo nga Pirimia, mo nga Minita o te tari Maori. Ko ia ki te hoatu kupu ki nga tangata nunui o te Paremata hei whakamarama heiwhakangawari hoki i o ratou hinengaro mo nga take a nga iwi Maori o te motu. Nana etahi o nga mahi ki nga mana Kawanatanga (i ngaro i te kanohi tangata) i tere ai te tutuki o te Kechi a Te Arawa mo ana moana.

Ko ia tonu tetahi o nga kai-whakahaere o te kechi a ngati tuwharetoa i tutuki pai ai tera o nga taonga nui a te iwi Maori. Ko ia te Hekeretari o etahi ropu nunui o te motu i raro i nga mana Kawanatanga.

I te wa ka rangona tera e tae mai te Tiuka o Ioka me tona hoa wahine kia kite i te iwi Maori, i tukuna mai te mana whakahaere o te Kawanatanga ki nga ringaringa o Te Raumoa.

Tutuki pai katoa nga whakahaere mo te manaaki a te iwi Maori i te tama a to tatou Kingi.